

**Kiriya Gihe I Kaluvvari**  
Jeffersonville, Indiana, USA  
25 Nzeli 1960

1 Urakoze, Mwene Data Neville. [Mwene Data Neville avuga ati: "Imana iguhe umugisha, mwene Data!" -Umwanditsi.] Imana iguhe umugisha, Mwene Data Neville. Urakoze cyane.

Mwaramutse, ncuti zanjye. Ni amahirwe kongera kuba muri uru rusengero, muri iki gitondo, gukorera Uwiteka, mbwiriza Ijambo kandi nsengera abarwayi. Kandi ndashimira Imana cyane ku bw'uyu munsi.

Mpagera, nari ngiye gutungurwa. Mwene Data umwe yaje ansanga, maze ambwira ati: "sinashakaga kuba nka wa mubembe udakwiye wari wahumanuwe." Ni Mwene Data Wright. Naramusengeye, maze Uwiteka aramukiza neza. Yaje arira, ankora mu ntoke maze ambwira ko yashakaga gushimira Uwiteka kuba Yaramukijije. Yashakaga kugaruka gushima. Nta burwayi na buke agifite. Amerewe neza ubu. Turashima ubwo buhamya.

2 Kandi, Charlie, wowe na Mwene Data Jefferies, mushobora kuza mugafata umwanya hano ku gicaniro. Muhawe ikaze; bityo ntimugomba gukomeza guhagarara. Uriya mwene Data nawe, na Mwene Data Woods, nimuzamuke hano. Mwebwe... Haracyari imyanya, hano ku ntebe; kuri ubwo ntimugomba gukomeza guhagarara. Ntekereza ko hakiri imyanya mike hano, kandi, yego, muhawe ikaze, nimuze muyicaremo.

Turanezerewe, na twe. Ntekereza ko havuzwe, igihe kimwe ngo: "Ndanezerwa iyo bambwiye..." Imana ibahe umugisha, mwene Data. [Mwene Data umwe avuga ati: "Dukunda kuba hafi y'umubwirizabutumwa." -Umwanditsi.] Murakoze. Murakoze - murakoze. "Ndanezerwa iyo bambwiye ngo tuje mu nzu y'Uwiteka." Ni amahirwe y'Umukirisito, kandi kujya mu nzu y'Uwiteka, bimubera umunezero.

3 Nitegereje hirya no hino, nkabona incuti zanjye nyinshi ziri hano, muri iki gitondo, byandenze mu by'ukuri. Nejejwe no kubona Mwene Data na Mushiki wacu Dauch bari hano, baturutse muri Ohio. Ndabona Mwene Data na Mushiki wacu Armstrong hariya, inyuma, bakoze urugendo bava muri Ohio. Imana ibahe umugisha na mwe. Kandi, yoo, ndeba hirya no hino, ndabona benshi ku buryo ntabasha kubavuga mu mazina bose. Mushiki wacu Hoover, w'i Kentucky, tunejejwe no kukubona hano muri iki gitondo. Na Charlie na Nellie, Mwene Data Jefferies n'umuryango we, n'abandi benshi, bo hanze y'umurwa.

Rero, muri iki gitondo, twiteguye kugira ibihe byiza mu Mwami. Twiteguye kubona Imana idusanga kugira ngo Ihe umugisha ubugingo bwacu kandi ngo Iduhe ibyo dukeneye.

Ndaranganya amaso ku iteraniro, ndamutse mvuze mu mazina incuti zanjye zose ziri hano, abensi mu bari muri iri teraniro nabavuga, mvuga buri wese mu izina rye. Nejejwe no kuba nagarutse mu rusengero, ngo mbone abantu bose bari hano, tukabona amahirwe yo guhura...

4 Bizamera bite nitugera mu Ijuru, maze tugahurira Hariya, muri kiriya gihe gikomeye cy'ubusabane bw'Iteka butagira iherezo, tugose Intebe y'Ubwami y'Imana, dusangira imigisha twari twarabuze twese? Hariya, tuzaba dusa na We, turi mu ishusho Ye, kandi dufite Mwuka We muri twe, kugira ngo tumuramye kandi tumukorere by'Iteka, tutananirwa na busa.

Nimutekereze, mu byo mukunda gukora, nta na kimwe mwashobora gутekerezaho, mutashobora kugera ubwo mukirambirwa. Charlie, ntekereza ko njye na we twahize udutimba, - mu byo dukunda gukora, ni cyo twakoze kurusha ibindi, mu bintu nka biriya, - ariko, urabizi, umuntu aruhira kubirambirwa.

Kandi nkunda gukora ingendo, kujya mu misozi gutemberayo. Ariko rimwe na rimwe, birandambira. Charlie, umuntu yumva yifuza kugira ikindi yakora.

Kandi nkunda gutwara imodoka. Rimwe na rimwe, numva naniwe, nashize, nasenytse. Rero nsimbukira mu modoka yanje maze ngafata umuhanda; ibiganza kuri deregisiyo, nkayitwara, ndirimba "Nejejwe no kuvuga nti: Ndi umwe muri bo!" cyangwa ikintu nk'icyo. Ibiganza bitava kuri deregisiyo, ndaririmba, ngakubita ikirenge hasi, nkavuza induru. Mu by'ukuri, hashize akanya gato, birandambira, hanyuma ngataha i muhira, nkagira ikindi nkora.

Ariko nidutangira kuramya Imana muri buriya Bwami bushya, ntihazaba akanya na gato k'umunaniro, bizaba gusa - gusa umugisha w'Iteka, ubuziraherezo gusa. Ariko, mu bisanzwe, icyo gihe tuzaba twahinduwe. Ntituzaba tukiri uko turi ubu. Tuzaba turi abandi, ibiremwa bitandukanye n'icyo turi cyo muri aka kanya. Rero, turanezerewe.

5 Nari ndiho ntekereza. Sinzi niba namaze kubifata amajwi cyangwa ntarabikora. Mwene Data Charlie, hashize igihe gito, nari kumwe na we muri Kentucky, maze ambwira ati: "Mwene Data Branham, ese utekereza ko, mu Ngoma y'imyaka igihumbi, njye na we, tuzajya guhiga udutimba?"

Mubwira nti: "Ndabighakaniye, Charlie."

Avuga ati: "Ariko, twarabikundaga cyane, ese utekereza ko tuzabikora, nitugera mu Ngoma y'imyaka igihumbi?"

Mvuga nti: "Oya, mu Ngoma y'imyaka igihumbi, nta kizicwa."

Hanyuma avuga ati: "Ariko, twarabikundaga cyane."

Mvuga nti: "Charlie, byamera bite iyo mba nari nshoboye kukwemeza ko wigeze kuba ingurube, ukaza gutera imbere, ukageza ubwo uba umuntu. Ese wakwemera gusubira inyuma, ku buryo washimishwa n'ibinezeza ingurube?"

Avuga ati: "Ntibikabeho."

Mvuga nti: "Urabona, wasumba ingurube cyane, ubu uri umuntu, ntiwakwifusa kongera kuba ingurube." Mvuga nti: "Noneho, gwiza ibyo incuro ibihumbi icumi, kandi ni cyo uzaba ubwo uzaba umaze guhindurwa, ugereranije uko uzamera n'uko uri ubu. Ntuzaba ucyifuje kongera kuba umuntu."

Ni ukuri. Bizaba ari ibindi. Ndanezerewe cyane, mbitewe no kubitekereza gusa: kumenya ko igihe kimwe tuzazamuka mu kirere.

6 Ni byiza, noneho, niba ari ubushake bw'Uwiteka, kucyumweru gitaha, ni ukuvuga ahagana tariki... Hanyuma nzajya muri Wyoming, njyanye n'incuti yanje magara, cyangwa, muri Idaho, hamwe n'incuti yanje magara, Mwene Data Miner Arganbright, Mwene Data Clayt Sonmore, Abacuruzi b'Abakirisito.

Icyumweru gitaha, ikizakurikiraho, ni ukuvuga tariki 7, ngomba kuba ndi i Dallas, muri Tegizasi (Texas), mu giterane cy'«Ijwi ryo Gukiza indwara». Kandi ngomba kubwiriza tariki 7 nimugoroba. Kandi nzava aho njya muri Idaho, kubana na Mwene Data Arganbright n'Abacuruzi b'Abakirisito. Nshobora kuzamara umugoroba 1 i Minneapolis, mbere y'uko tuhava. Hanyuma habe ifunguro rya mugitondo ry'Abacuruzi b'Abakirisito.

Niba ari ubushake bw'Uwiteka, kucyumweru gitaha, ndashaka kuzaba ngarutse hano ku rusengero, kandi niba mbyemerewe, kandi bikaba ari ubushake bw'Uwiteka, nashakaga kuvuga ku mutwe Serwakira mu muyaga, niba ari ubushake bw'Uwiteka.

7 Mbimaranye icyumweru cyose ku mutima.

Kandi kiriya gitondo, kare kare, ahagana saa 10 z'ijoro, narakangutse, maze ngira iki gitekerezo: "Kiriya gihe i Kaluvari." None ndashaka kukivugaho, muri iki gitondo: Kiriya gihe i Kaluvari.

Kandi noneho, dufate Bibiliya zacu, Ubutumwa Bwiza uko bwanditswe na Matayo, igice cya 27. Maze, dusome duhereye ku murongo wa 27, turasoma imirongo mike, kugira ngo tubone urufatiro rwacu, hanyuma duhite dutangira. Kandi nyuma y'ikibwiriza, turasengera abarwayi.

8 Kandi, yoo, uhoreye ubwo mperuka hano, ubwo nabibutsaga gusa imirongo y'ingenzi y'umurimo wanje mushya, nakomeje kubona ubuhamya ku birebana n'ariya materaniro uko ntigeze mbihabwa uhoreye kera.

Hari ikintu kimwe, hariya, gituma tugomba kubonana n'uwo muntu, uko ikidasanzwe cyaba cyashoboye kwerekana kose. Ariko, murabona, ugukira kugomba gushingira ku kwizera kwa muntu. Noneho, niba umuntu afite ukwizera...

Kandi niba tubonye, urugero, Mwuka Wera agendagenda mu iteraniro maze Akavuga ati: "Ibi na biriya bintu byarabaye. Kandi niba witwa kanaka cyangwa se runaka. Kandi ukaba uturuka i bunaka. Kandi ukaba warakoze iki n'iki. Kandi bizagenda gutya." Tukabona ibyo byose bisohora neza!

Nyamara, umuntu uri hariya, yakagombye kubura amaso maze akavuga ati: "Ni Imana yonyine. Nakiriye gukira kwanje."

9 Ah'ubwo, uwo muntu avuga ati: "Ndambikaho ibiganza, maze unsengere, kugira ngo nkire." Ariko ni byo twigishijwe, hano muri Amerika, kandi rero, no kubyizera. Kandi bihuye n'Ibyanditswe, nta gushidikanya.

Ibiri amabu, hariya, tubona ko muri Afurika n'ahantu hanyuranye: ko ikintu nk'icyo kiba, maze iteraniro ryose bagategera amaboko icyarimwe, maze bakakira ugukira kwabo, kuko bo, ari nta na gito babigishije. Murabona? Nta n'ubwo babigishije ugukira indwara. Hanyuma babona ibyo, bakamenya ko hariho Imana nzima. "Kandi, niba ari Nzima, Ni ikirenga, kandi Irakiza." Kandi hamwe n'ibyo, birahagije, kuko urufatiro rwamaze gushyirwaho, ko ari Yo ikiza, kandi Ikaba ikiza abantu. Hanyuma, iyo babonye imbaraga Zayo zikorera mu Itorero Ryayo, nibwo bavuga bat: "Bikemuye ikibazo. Nta kindi dukeneye."

Naho twe, batwigishije "ukurambika ibiganza ku barwayi", n'ibantu nk'ibyo. Ni yo mpamvu bitagenda neza nk'ahandi muri Amerika.

Noneho, mwibuke, kucyumweru gitaha mugitondo, niba ari ubushake bw'Uwiteka, - uko bisanzwe, Mwene Data Neville azabitangaza, - bizaba ari Serwakira mu muyaga.

10 Noneho nabahaye igihe gito ngo mufate Matayo 27, mu Byanditswe. Dutangire gusoma umurongo wa 27, w'Ubutumwa Bwiza bwa Matayo. Noneho, twumve isoma dutuje.

*Maze abasirikare ba leta bajyana Yesu mu rukiko, bamuteranirizaho ingabo zose.*

*Baramucuza, bamwambika umwenda w'umuhemba.*

*Baboha ikamba ry'amahwa barimwambika mu mutwe, n'urubingo mu kuboko kwe kw'iburyo baramupfukamira, baramushinyagurira bat: "Amahoro, Mwami w'Abayuda."*

*Bamuciraho, benda rwa rubingo barumukubita mu mutwe.*

*Bamaze kumushinyagurira bamwambura ikanzu ye, bamwambika imyenda ye bamujyana kumubamba.*

*Bagisohoka, bahura n'umunyasirene witwaga Simoni, uwo bamuhata kujyana na bo ngo yikorere umusaraba wa Yesu. Bageze ahitwa i Gologota, hasobanurwa ngo i Nyabihanga, bamuha vino ivanze n'indurwe ngo anywe, asogongeye yanga kuyinywa.*

*Bamaze kumubamba, bagabana imyenda ye, barayifindira*

...bicara aho baramurinda.

*Bashyira hejuru y'umutwe we ibirego bamureze, byanditswe ngo "UYU NI YESU UMWAMI W'ABAYUDA."*

*Maze abambuzi 2 babambanwa na we, umwe iburyo bwe undi ibumoso.*

*Abahisi baramutuka, bamuzunguriza imitwe*

*Baravuga bat: "Wowe usenya urusengero ukarwubaka mu minsi 3, ikize. Niba uri Umwana w'Imana, Manuka uve ku musaraba!"*

*Abatambyi bakuru n'abanditsi n'abakuru na bo bashinyagura batyo bat:*

*"Yakijije abandi, ntabasha kwikiza. Ko ari umwami w'Abisirayeli, namanuke ave ku musaraba none aha, na twe turamwemera.*

*Yiringiye Imana, ngaho nimukize none aha, niba imukunda kuko yavuze ati: 'Ndi Umwana w'Imana.'*

*N'abambuzi babambanywe na we, na bo bamutuka batyo.*

*Uhereye ku isaha ya 6 haba ubwirakabiri mu gihugu cyose kugeza ku isaha ya 9.*

*Maze ku isaha ya 9 Yesu avuga ijwi rirenga ati "Eli, Eli, lama sabakitani?" Bisobanurwa ngo "Mana yanje, Mana yanje, ni iki kikundekesheje?"*

*Ariko bamwe mu bari bahagaze aho babyumvise baravuga bat: "Umva wa mugabo arahamagara Eliya."*

*Uwo mwanya umwe muri bo arirukanka, yenda sipongo ayuzuza inzoga isharira, ayishyira ku rubingo arayimushomesha.*

*Ariko abandi bat: "Ba uretse turebe ko Eliya aza kumukiza."*

*Ariko Yesu yongera kuvuga ijwi rirenga, aratanga.*

*Umwenda ukingirije Ahera h'urusengero utabukamo kabiri, utangirira hejuru ugeza hasi, isi iratigita, ibitare birameneka, ibituro birakinguka, intumbi nyinshi z'abera bari barasinziriye zirazurwa.*

*Bava mu bituro, maze amaze kuzuka binjira mu murwa wera, babonekera benshi.*

*Umutware utwara umutwe w'abasirikare n'abari kumwe na we barinda Yesu, babonye igishyitsi n'ibibaye baratinya cyane bat: "Ni ukuri, uyu yari Umwana w'Imana."*

11 Twicishe bugufi akanya gato ngo dusenge.

Mwami, tuzi ko Uri Imana. kandi ibyo... Nyuma yo gusoma iri Jambo ryera, dushobora kongera kubona ko kamere Yawe itahindutse. Uzahora uri Imana. Kandi icyagaragaraga ni uko Yesu atari afite ubutabazi

na buke, Akaba yari ari mu maboko y'abanyabyaha, kandi bari bamushenjaguye, bari bamuciriye mu maso, bari bamusetse, kandi bari bamumanitse ku musaraba, Avirirana, Asamba. Kandi icyagaragaraga ni uko ari nta butabazi na buke Yari afite, ku buryo Yiyamiriye ati: "Mana Yanje, Mana Yanje, ni iki kikundekesheje?"

Ah'ubwo Ukora igihe ari nta kindi na kimwe gishobora gukora. Twamenye, Mwami, ko iyo dufite imigezi tudashobora kwambuka, ko iyo dufite imisozi utagenda ngo uyirangize, Imana ni inzobere mu bantu abantu batashobora.

Uri inzobere mu murimo; mu by'ukuri, Wari uzi impamvu ya kiriya gihe i Kaluvari. Wowe, Uri Imana, Itagira aho igarukira, Wari uzi ko kiriya gihe kigomba kubaho. Ariko umaze gusohora, ni bwo Werekanye ko Uri Imana. Werekanye Igihangange Icyo ari cyo.

12 Isi yahinze umushyitsi, maze abera bari barasinziririye mu butaka barazurwa. Izuba ririjima, mu ijoro... nko mu mwijima w'ijoro, kugira ngo Werekane ko Wari Imana. Ariko Wasaga n'Uwicecekeye igihe kirekire.

Reka dufate uyu mwanzuro: igihe cyose tuzaba tugendera mu Mwuka, tuyoborwa n'ikiganza cy'Imana, uko Ibyaba bimeze nk'ibisa n'ibitagenda neza kose, buri gihe, duhanganye na Kaluvari; Imana izavugira igihe ishakiye, aho Ishakiye.

Noneho, Mana Data, tugasabye kutubabarira ibyaha byacu n'ibicumuro byacu. Dusabye kuyoborwa na Mwuka Wawe. Tuyobore, nk'uko Inuma yayoboye Umwana w'intama. Dushoboze kumvira mu bishobora kudushyikira byose, tuzi ibi, ko Imana ihuriza byose hamwe kuzanira ibyiza abayikunda, rero tuzi ko byose bizagenda neza.

Bana na twe uyu munsi, muri aya materaniro. Tugasabye gukiza abo bishoboka, bashakisha agakiza. Uzuza Ubugingo Buhoraho ababushakisha. Tugasabye gukiza abarwayi n'abaremerewe, baje gushakisha gukira. Kandi tuzabigushimira. Tubisabye mu Izina ry'Umwana Wawe, Umukiza wacu, Yesu Kirisito. Amen.

13 Noneho, mu kibwiriza cy'iki gitondo, turashaka kubakangurira igitomwa nahisemo kuvugaho: Kiriya gihe i Kaluvari.

Bishobora kugaragara nk'ibikozwe imburagihe; byakagombye kuba ku wa gatanu mutagatifu. Twakagombye kwibuka Kaluvari buri muns! Twumvise ibintu byinshi kuri wo, twasomey byinshi kuri wo. Ababwirizabutumwa babwirije kuri wo, uhereye mu itangiriro ry'ibihe. Abaririmbyi barawuririmbye mu bisekuru byose. Abahanuzi barawuhanuye, imyaka 4,000 mbere y'uko uba. Kandi abahanuzi ba none bereka abantu igihe ibyo byabereye. Ni umunsi w'ingenzi cyane! Mu minsi Imana yabeshejeho ku isi, ni umwe mu minsi ihebuje indi kuba ingenzi.

Kandi niba ari ingenzi ku nyokomuntu ako kageni, Kaluvari, ntekereza ko byatubera byiza gusubira inyuma, maze tukabisuzuma, tukareba icyo bivuze mu by'ukuri, kuri twe. Mu by'ukuri, sinshidikanya ko muri iki gihe cya nyuma turimo, dushaka kumenya biruseho akamaro k'Imana. Ibyo dushobora kuvumbura byose, turi hano ngo tubyige, kugira ngo tubone ibyacu, n'ibyo Imana yadukoreye, no kubona ibyo Imana yadusezeranje. Kandi ni cyo kituzana mu rusengero.

14 Ni yo mpamvu umubwirizabutumwa abwiriza, ni cyo kimutera gutekereza ku Byanditswe, maze agashaka ihumekerwa. Ni uko ari umugaragu, ukorera ubwoko bw'Imana. Kandi agerageza kugira icyo abona gi.... icyo Imana yashakaga kubwira ubwoko Bwayo, icyabafasha. Byashoboka ko kibaciraho iteka mu byaha byabo, ariko cyabafashije kubyuka, kugira ngo bareke ibyaha byabo, hanyuma bakabyukira gukorera Uwiteka. Abagaragu b'Imana bakagombye gushakisha ibyo bintu.

15 Niba uriya munsi ari uw'ingenzi cyane, niba ari umwe mu minsi y'ingenzi, twitegerezze mu ngingo 3 zinyuranye icyo uriya munsi watumariye. Twagashoboye gufatamo ingingo amagana. Ariko, iki gitondo, nahisemo gusa ingingo 3 zinyuranye, z'ingenzi cyane, dushaka kwitaho mu mwanya muto ugiye gukurikira, kandi werekana icyo Kaluvari yatumariye. Kandi ngusabye ngo bicireho iteka buri munyabyaha wese uri hano, bitere buri wera gupfukama, bitere buri murwayi kuzamurira Imana ukwizera kwe maze atahé yakize, bitere buri munyabyaha gukizwa, buri wese wasubiye inyuma bimugarure kandi yitere isoni, naho buri uwera bimunezeze kandi bimuhe ingoga nshya, ibyiringiro bishy.

16 Ingingo nkuru ikomeye, icyo Kaluvari itumariye twebwe n'isi yose, ni uko yakemuye ikibazo cy'icyaha rimwe na rizima. Muntu yari yarasanzwe ashinjwa icyaha. Kandi icyaha cyari umubabaro umuntu n'umwe atashoboraga kwikiza, uwo mubabaro wari mwinshi ku buryo ari nta muntu washoboraga kuwikiza. Nizera by'ukuri ko Imana yari yaciye iteka ko ari uko byagombaga kugenda, - ko umubabaro wakagombye kuba mwinshi ku buryo ari nta muntu n'umwe wagashoboye kuwikiza, - kugira ngo Ibe ari Yo ibyikorera Ubwayo. Nyamara, igihano cy'icyaha, ni urupfu. Kandi twese twavukiye mu cyaha, twasamiwe mu gukiraniwa, tuza mu isi tuvuga ibinyoma. Ku bw'ibyo, nta n'umwe muri twe, wari ukwiye, kandi nta n'umwe washoboraga kuboneka mu isi akwiriye.

17 Kandi icyaha nticyatangiriye mu isi. Icyaha cyatangiriye mu Ijuru. Lusuferi yari... Lusuferi, Satani, yari

ikiremwa cyaciriweho iteka, kubera kutumvira kwe, na mbere y'uko agera ku isi. Icyaha cyatangiriye mu Ijuru, aho Imana yashyizeho Abamarayika, n'ibindi, ku rugero rumwe n'abantu. Ubumenyi, igiti cy'ubumenyi, ku buryo umuntu yashoboraga kwihitiramo. Kandi ubwo Lusuferi yahabwaga amahirwe yo kwihitiramo, yashatse ikiruta icyo Imana yari ifite. Aho ni ho ibibazo byatangiriye.

18 Kandi icyaha hari icyo cyasabaga. Icyasabwaga, cyari urupfu. Urupfu ni rwo rwari igihano. Kandi hariya, twagashoboye kubijyamo mu buryo burambuye, kuko ntemera ko habaho urupfu rumwe gusa. Habaho Ubugingo bumwe gusa. Nizera ko umuntu ufite Ubugingo Buhoraho adateze kuzapfa. Nizera ko hariho ukurimbuka burundi k'ubugingo bukora icyaha; mu by'ukuri, Bibiliya ivuga iti: «Ubugingo bukora icyaha, ni bwo buzapfa bidashidikanywaho.» Si umuntu, ah'ubwo «ubugingo bukora icyaha». Rero, Satani agomba kuzapfa byanze bikunze, akarimbuka. Sinemeranya by'ukuri na ba «universaliste», bavuga ko Satani azakizwa. Yakoze icyaha, kandi ni we muhanzi w'icyaha. Ubugingo bwe bwakoze icyaha; kandi yari umwuka. Uwo mwuka uzarimbuka rwose pe, nta n'agace kawo na gato kazasigara.

19 Kandi ubwo icyaha cyazaga ku isi, hariya mu ntangiriro, nk'urusika rw'umwijima rwaguye ruvuye mu ijuru, cyaremaje isi bidasubirwaho. Yaroshye mu bubata ibyaremwe byose byo ku isi n'ibyo Imana yaremye byose. Umuntu yari mu bubata bw'urupfu, bw'indwara, bw'irungu, n'ubw'agahinda. Hamwe na we ibyaremwe byose byaraguye. Icyaha cyari ikinya, mu by'ukuri, cyaremaje isi. Rerotwisanze hano, ari nta byiringiro, kuko ibyaremwe byose by'isi byari bibaswe na cyo. Kandi abavukiraga ku isi bose bari mu bubata bwacyo.

Rero, byagombaga kuva Aho icyaha kitigeze kuba. Ntibyashoboraga kuva mu isi. Umwe muri twe ntiyashoboraga gucungura undi. Byagombaga kugira Undi biturukaho.

Rero ubwo muntu yamenyaga ko yari yatandukanye n'Imana ye, yahindutse inzererezi. Barariraga. Baraborogaga. Banyuraga mu mibabaro. Bazereraga mu misozi n'ubutayu, bashakisha Umurwa wubatswe n'Imana. Mu by'ukuri, yari azi ko aramutse agarutse mu Bwiza bw'Imana, yashobora kubijyaho impaka na Yo. Ariko nta buryo bwari buhari bwo kugaruka. Yari yazimiye. Ntiyari azi icyerekezo yafata, maze ahinduka inzererezi, agerageza kubona ahantu hamwereka uburyo bwo kugaruka aho Hantu. Hari icyari muri we cyamubwiraga ko hari Ahantu yaturutse, hari hatunganye.

20 Nta muntu uri hano n'umwe, mu bateze amatwi baboneka muri iki gitondo, cyangwa mu bazumva iyi bande iriho amajwi, aho izagera hose, mu isi yose, nta muntu n'umwe, uri hano cyangwa ahanti, udashaka ubwo Butungane.

Mwishyura imyenda yanyu, maze mukavuga muti: «Bizakemura ikibazo.» Iyo wishyuye imyenda yawe, ni bwo umuntu umwe mu muryango wawe afatwa n'uburwayi. Iyo bigenze neza ku birebana n'uburwayi, ni bwo mubona indi myenda yo kwishyura. Muri ako kanya, imisatsi yawe ihinduka imvi, hanyuma ukifusa gusubira i busore. Hakomeza kugira ikibaho, ubudahwema, kandi ni ukubera uwo muraba w'icyaha. Ariko mu mutima wawe, kuba ushaka ubwo Butungane, bigaragaza Hariho. Ahantu hamwe, hari Ikintu.

21 Ni yo mpamvu ubu, akensi, umunyabyaha ahora ari inzererezi. Umukobwa w'inkumi nziza yiyyogoshesha umusatsi ngo abe icyamamare, akisiga amarange mu maso ngo abe mwiza, akambara imyenda ishushanya isoni z'ubwambure bwe. Ni uko ari nta kindi ashobora kubona, ahantu na hamwe, ashakisha ikintu cye: iyo atera abagabo kuvugiriza bamuhamagara, bamucira amarenga, bamuhehetia. Umusore na we azagirira atyo umugore. Azagerageza kumushukashuka. Abaturanyi bazubaka inzu maze bayitunganye mu buryo bumwe, kuko bityo, izagaragara ko iruta iy'umuturanyi. Bikomeza bityo, tugira icyo dushakisha, kandi hahora haboneka ikiruseho.

22 Inkumi izabona indi iyirushije kuba icyamamare. Umuturanyi azabona inzu irushije iye kugaragara neza. Umugore azabona undi wambaye mu buryo amurusha kugaragara neza.

Ni ikintu muri twe, gifite icyo gishakisha, kandi byerekana ko twazimiye. Dushaka kubona icyo kintu kizatuzanira kunyurwa, kikaziba icyo cyuho, kikamara iyo nzara iri imbere, ariko wagira ngo ntitubasha kukibona. Abantu baragishakishije, uko ibisekuru byagiye biha ibindi. Ku bw'ibyo, bararize. Baraboroze. Bakoze ibishoboka byose, ariko ntibagira icyo babona, bazereraga mu isi.

23 Hanyuma, igihe kimwe, - kiriya gihe cya Kaluvari, - hari Uwamanutse agasiga Ubwiza. Umuntu umwe witwa Yesu Kirisito, Umwana w'Imana, yasize Ubwiza, maze Kaluvari ibaho. Ni bwo Ikiguzi cyishyurwaga, maze ikibazo gikemuka rimwe na rizima. Kandi ni cyo cyuguruye inzira yerekeza kuri cya kintu dufitiye inzara n'inyota. Ni cyo cyatugejeje aho tunyurirwa. Nta muntu wageze i Kaluvari, akabona ibyahabereye, ngo agume uko yari ari. Icyo yifuje cyose, akibona, iyo ageze aho hantu.

Ni umunsi n'ikintu by'ingenzi cyane, ku buryo byanyeganyeje isi. Byanyeganyeje isi, inyeganyega uko itabyigeze mbere. Ubwo yapfiraga i Kaluvari, maze Agakemura ikibazo cy'icyaha,

24 iyi si y'icyaha yarohamye mu icuraburindi. Izuba ryijimye ku manywa y'ihangu, ryabaye nk'iripfuye. Ibitare byaranyeganyeze, imisozi irasaduka, maze ari kanya intumbi z'abera zirazurwa.

Byagize ngaruka ki? Imana yagiye imoneje i Kaluvari. Yakomerekeje by'Iteka iyo nyamaswa yitwa Satani. Uhoreye icyo gihe, iyi nyamaswa yarushijeho kugira ubugome, kuko ari cyo cyazaniye inyokomuntu Umucyo. Kandi nta utazi ko iyo inyamaswa ikomeretse, ari bwo irushaho kugira ubugome; izerera hose, ivunitse umugongo. Nyamara, Satani yakubiswe incuro iyishegesha, i Kaluvari. Isi yahamije ko ari cyo cyabaye.

Ikiguzi cy'ikirenga cyigeze kwishyurwa, Umwe rukumbi washoboraga kucyishyura yaje kushyurira, i Kaluvari. Ni bwo ikiguzi cy'ikirenga cyishyuwe. Iyo ni imwe mu ngingo.

25 Imana yari yarasabye icyo. Nta muntu n'umwe wari ubikwiye. Nta n'umwe wari ubishoboye. Nta muntu n'umwe wari ushoboye kubikora. Ni bwo imana yazaga, Yo Ubwayo, Yigira umuntu, Ibaho ubuzima bwa kimuntu, bugira ibyifuzo bya kimuntu, maze Ibambwa i Kaluvari. Kandi hariya, mu gihe Satani yatekerezaga ko Atajyaga kubikora, ko Atajyaga kugera ku iherezo, Yihanganiye Getsemani n'ibishuko bitagira umuntu n'umwe wabyihanganiye. Yihanganiye ibyo byose, kimwe n'abantu bose, ah'ubwo Yishyuye ikiguzi.

Kandi ni cyo cyaroshye isi mu icuraburindi. Byari nk'ikinya, giterwa ujya kubagwa. Iyo umuganga atera umurwayi ikinya... mbere yo kumubaga, abanza kumusinziriza. Kandi ubwo Imana yagiraga Uwo ibaga, ku bw'Itorero, isi yatewe ikinya, ibidukikije byahinze umushyitsi. Nta bwo bitangaje! Imana, mu mubiri wa kimuntu, yarasambaga. Ni cyo Gihe isi yari itegereje, nyamara, abensi muri bo nta byo bari bazi.

Ni cyo kimwe na n'ubu: abensi bategereje ibyo bintu, kandi nyamara, ntibabizi. Ntibabona uburyo bwo kubyikuramo, baracyashakisha ibinezeza n'iby'isi, bagerageza kubona uburyo bwo kubyikuramo.

26 Hari harabanje kubaho ibyapa byinshi byategurizaga kiriya Gihe, ingero zikomeye nyinshi. Ni byo byashushanywaga n'umwana w'intama, n'ikimasa, n'intungura n'ibyo bintu byose. Nyamara, ntibyashoboraga gukemura icyo kibazo. Ntibyashoboraga gukuraho imbaraga z'urupfu, izo Satani yari yarashyize isi munsi.

Amabuye yari yarigeze gukandagira, atembera ku isi: amakoro yaka umuriro! Lusuferi yari umwana w'uruturuturu, kandi yari yaragenze ku isi ubwo yari ikirunga cyaka umuriro. Ariya mabuye, yahoze, ubwo Yesu yapfiraga, i Kaluvari, ni amakoro yavuye mu nda y'isi.

Ikiguzi cyarishyuwe, ububata bwa Satani bukurwaho.

27 Imana yashyize mu biganza bya muntu uburyo bwo kugaruka ku cyo yashakishaga. Ntiyagombaga kuba akirira. Iriya ntimburo, ubwo yamenaga impyiko za Satani, hariya i Kaluvari, impyiko z'icyaha, iz'uburwayi! Kandi ni cyo cyagaruye buri muntu mu Bwiza bw'Imana, amaze kubabarirwa ibyaha bye. Haleluya! Ibyaha byacu twarabibabariwe. Satani ntagishobora kuduheza mu icuraburindi, kure y'Imana.

Umuhande mugari waraciwe. Telefoni yashyizweho. Hari umurongo wo kuvugana n'Ubwiza, nta muntu rero, uhejwe kuri uwo murongo. Niba umuntu yuzuye ibyaha: ibyo byamuhuje n'ubo murongo, ashobora kubabarirwa icyo cyaha. Si ibyo gusa, ah'ubwo ikiguzi cy'icyo cyaha cyarishyuwe. Yoo! Ntugomba kuvuga uti: «Sinkwiriye.» Nta gushidikanya ko udakwiriye, ntiwashoboraga kuba ukwiriye. Ah'ubwo hari Uwari ukwiriye wagiye mu cyimbo cyawe. Ufite umudendezo. Ntugomba kuzerera. Ntugomba kuba umuntu ushakisha ibinezeza by'isi.

Kuko hari Isoko yuzuye Amaraso

Y'imitsi ya Emanweli,

Umunyabyaha wese wibiyе muri urwo ruzi,

Yozwaho icyaha cyose.

Ntugomba kurimbuka. Hari umuhande mugari, n'Inzira, kandi yitwa Inzira yo kwera. Uwanduye ntazayinyuramo. Mu by'ukuri, abanza kunyura ku isoko, hanyuma akinjira mu muhanda mugari.

28 Yambuye Satani ububasha. Yakinguye amarembo y'ikuzimu, ku muntu wese wari ufungiye kuri iyi si, muri za gereza, watinyaga igihe azapfira, icyo urupfu rwari rumuzigamiye. I Kaluvari, Yakinguye imiryango ya za mabuso, maze Abohora imbohe zose. Ntugomba kuba ugisenya n'icyaha. Ntugomba kuba ugija ingingo zawe icyaha: kunywa, kunywa itabi, gukina urusimbi, kubeshya. Ushobora kuba umwizerwa, umukiranutsi n'intungane. Kandi Satani nta cyo yabikoraho, kuko wafashe umugozi, umugozi w'Umutekano, watewe mu Gitare cy'Ibihe. Nta mutingito na muke wagutandukanya na cyo. Nta na busa, nta n'urupfu ubwarwo, rwashobora kugutandukanya n'urukundo rw'Imana ruri muri Kirisito Yesu.

29 Ngicyo icyo Kaluvari yamaze.

abantu bari mu bubata babonye umudendezo. Abantu, bahoze, kera, batinya urupfu, bashobora kuba

batagitinye urupfu ukundi. Umuntu ushakishanya umwete Umurwa wahanzwe kandi ukubakwa n'Imana, ashobora kwinjira mu muhanda mugari, hanyuma akararama areba Ijuru, kuko ari uw'umudendezo. Haleluya! Yaracunguwe. Ntagikenye kuzerera. Mu by'ukuri, hari uburyo bwo kumenya niba uri mu kuri cyangwa utakurimo. Imana iduha Ubugingo. Ibyaha byacu byaribuze. Kiriya gihe i Kaluvari cyishyuye ikiguzi. Iyo tubonye ibyo byose, ntibitangaje kuba umusizi yaranditse ati:

Mu gihe ibitare byasadukaga

n'ibicu bikijima,

Umukiza wanje yacuritse umutwe maze arapfa.

Umwenda watabutse wahishuye Inzira

Igana mu munezero w'Ijuru n'umunsi utazashira.

30 Aburahamu ntakigomba kuba azerera hose mu gihugu, ashakisha Umurwa. Umunyabyaha ntakigomba kuba yibaza niba ashobora gukizwa cyangwa atabishobora. Umurwayi ntakigomba kuba yibaza niba ashobora gukira cyangwa atabishobora. Umwenda watabutse, kiriya gihe i kaluvari, cyahishuye Inzira igana ku ntsinzi yuzuye. Imana yaduhaye imbaraga za Mwuka Wayo, kugira ngo tugire ubuzima bunesha, tunesha ibyo bintu byose; icyo Idusaba gusa, ni ukubyizera. Ni cyo cyabaye, kiriya gihe i Kaluvari. Ntihigeze kubaho umunsi nk'uriya. Ntihateze kuzabaho umunsi nk'uriya. Ntibikiri ngombwa. Ikiguzi cyarishyuwe, none twaracunguwe. Ntibikiri ngombwa kwibaza ibyo ari byo. Nta rujijo rukirihio. Ibyo byose byarahanaguwe. Byarasobanutse, none turi mu muhanda mugari, atari ukugira ngo twibaze ibyo ari byo, ah'ubwo ari ukugira ngo twizere kandi dukomeze kugenda, byonyine. Tugenda turomboreje mu Bwiza bw'Imana.

31 Aburahamu yari azi, n'abandi bari bazi, hariya, ubwo bashakishaga Umurwa. Bari bazi ko hari Aho baturutse. Hari icyari cyarabaye. Bari batuye ku isi yaremaye. Hari imitingito y'isi. Hariho imiyaga ya serwakira. Intambara n'ubwicanyi bw'indengakamere! Ikirura n'umwana w'intama byararyanaga, cyangwa, ikirura cyaryaga umwana w'intama, n'intare irya inka. Wagira ngo hari ikitagenda. Yari azi ko hari ikitagendaga. Umuntu, umuvandimwe yica undi; umuntu yica umwana we, umwana akica se. hari ikitagenda. Arasaza. Arapfa. Aba agasenzegeri. Yasogobwe n'uburwayi. Ari mu bubata. Ibiti birameria, ariko na byo bigapfa. Imisozi irahinduka. Inyanja zirakama. Amazi arakama. Hari ikitagenda. Kandi hari ahantu bashakishaga, Umurwa bitashoboraga kubamo. Yari azi ko aramutse ashoboye kugaruka mu Bwiza bw'Uwari waragize ibintu byose byiza, yagashoboye kubijyaho impaka na We.

32 Yoo, munyabyaha, mbega amahirwe, muri iki gitondo, yo kumenya ko ufite iyo Nzira ubu. Kiriya Gihe i Kaluvari cyaduciriye icyuhohitwinjiza mu Nzira. Mu by'ukuri, icyo abakurambere bashakaga cyose, icyo bashakishaga cyose, Kaluvari yarakibahaye, ku buntu. Mwashobora mute kubyitesha? Mwabyanga mukajya mu idini mute? Ni gute mwabyanga ngo mubisimbuze ikindi, ibinezeza by'isi? Kuki mutabyakira? Umwenda watabutse ugarura umuntu uromboreje mu Bwiza bw'Imana, ari nta cyaha cy'uburyo ubwo ari bwo bwose kimubarizwaho. Kandi ushyira imbere ye inzira, igeza ku cyo ashaka: Ijuru, ubwiza, amahoro, Ubugingo Buhoraho, byose biraboneye imbere ye.

33 Kiriya Gihe cyarimbuye ububasha bwa Satani. Cyabushyiriye iherezo.

Kandi nshobora kumubona hariya; ni We mwana w'intama wo muri Edeni, uhoreye ku gicucu cya mbere cyagaragaye.

Ubwo Abeli, binyuze mu kwizera, atambira Imana igitambo kirusha icya kayini kuba cyiza. Byabaye ngombwa ko afata umugozi akawushyira mu ijosu ry'umwana w'intama, akawukurura akawugeza ku rutare. Afata ibuye mu kiganza, ngo aryifashishe nk'icumu, abirindura agatwe kawo; maze atangira guhonda ijosu, arawushenjagura, kugeza upfuye. Kandi ubwoya bwawo bwari bwanyoye amaraso yayo bwite. Byari igicucu.

Ariko, kiriya Gihe i Kaluvari, Uriya ntiwari umwana w'intama wo muri iyi si, ah'ubwo wari Umwana w'intama w'Imana wasambaga, wari urambaraye mu Maraso Ye bwite. Isi yaramushenjaguye, yamuteje imisumari inyundo, yaramukubise, imucira mu maso, yaramuhutaje, yamukubise inshyi, n'ibindi; kandi Amaraso yatonyangaga ava mu musatsi We.

34 Ubwo umwana w'intama wa Abeli wapfaga, wapfuye uvuga mu rurimi rutumvikana. Waratamatamaga.

Kandi ubwo Umwana w'intama w'Imana yapfaga, kiriya Gihe i Kaluvari, Yavuze mu rurimi, nta muntu n'umwe wigeze arusobanukirwa: "Mana yanje, Mana yanje, ni iki kikundekesheje?" Wari Umwana w'intama w'Imana, washenjaguwe, wakubiswe inyundo.

Ni We Mwana w'intama Abeli yatekerezagaho, ubwo yabonaga urubyaro rwasezeranywe rw'umugore. Ni We Mwana w'intama w'intama Daniyeli yabonye, muri rya buye ryatogotse riva ku musozi ari nta muntu urihiritse. Ni We Ruziga hagati y'uruziga, ku muhanuzi. Ibyo bari barabonye mbere byose

byasohoye kiriya Gihe i Kaluvari. Ni cyo cyashohoje kiriya Kintu gikomeye. Ni cyo cyamennye Satani impyiko.

35 Icy a mbere, twakagombye gushakisha icyo kiriya Gihe cyamaze. Icy a 2, twakagombye kubona icyo kiriya Gihe cyadukoreye, rero, icyo cyadukoreye. Rero, icy a 3, turebe icyo twakagombye gukorera kiriya Gihe. Twebwe, twakagombye gukora iki?

Twakagombye kubanza kubisuzuma, kuko ari umunsi ukomeye, umunsi uruta indi yose. Ikibazo cy'icyaha cyarakemutse. Ububasha bwa Satani bwashyiriweho iherezo.

None ubu, turashaka kubona icyo twakagombye gukora nk'inyiturano, noneho, nk'inyiturano. Ubwo Yesu yapfiraga i Kaluvari, i Kaluvari, kiriya Gihe, uretse kuba Yarishyuye ikiguzi cy'ibyaha byacu, ah'ubwo Yishyuye ikiguzi maze Anaduha uburyo, ngo dushobore kumukurikira. Mu by'ukuri, twebwe, ba Adamu twaguye, twacunguwe, nk'uko Mwuka yayoboraga Adamu (Adamu wa 1), wari ufite ubutware ku byaremwe byose, ni ko, twebwe (ba Adamu wa 2), cyangwa abantu bo ku isi, twacunguwe na Kirisito, uhoreye kiriya Gihe i Kaluvari, dushobora kumukurikira.

36 Rero, ubwo Yapfiraga i Kaluvari, yaduhaye uburyo. Yashubije Umwuka, Mwuka Wera, ni uko Yoherejwe ku isi, kugira ngo wowe na njye, tubeshweho na We. Ni cyo Kaluvari itubwiye: kumukurikira, We.

Twakagombye kubisuzuma, kureba icyo Kaluvari yadukoreye. None ubu, ni iki tugomba kuyikorera? Njye na we, ni iki tugomba gukora?

Ni byiza, tuvuga tuti: «Mu by'ukuri, ibyo ndabishima. Ni igitangaza.» Ah'ubwo tugomba kubyemera. Kandi kubyemera, ni ukumwera We, Kirisito, mu mitima yacu.

Rero twabatuwe ku cyaha; ku bw'ibyo, nta munyururu w'icyaha n'umwe ukidufashe, nta numwe. Imana, - ni nk'aho tutigeze gukora icaha na gito, - Igitambo gitunganye cyaradutunganije. Mu by'ukuri, Yesu yavuze ati: «Mube rero abakiranutsi, nk'uko So wo mu Ijuru ari umukiranutsi.» Rero, nta kindi dukwiye gukora, ah'ubwo twatunganirijwe mu Bwiza bw'Imana.

37 Nyamara, ni aho dutakariza ighagararo cyacu. Niba tutabaye maso, tuzifuza kureba inyuma, ku cyo twahoze turi cyo, Igitambo nta cyo cyaba kitumariye. Yoo, murabibona, si byo, torero? [Iteraniro riti: «Amen.»-Umwanditsi.] Nta n'ubwo... Nta n'ubwo nashakaga kugerageza gukora uwo murimo. Sinshobora, na we ni uko. Nta cyo bimaze kugerageza. Wazimiye uhoreye mu ntangiriro, igihe cyose ukireba icyo wakoze. Ah'ubwo ntukarebe icyo wakoze.

Mwitegerezic和平 kiriya Gihe i Kaluvari cyabamariye. Cyabishyuriye ikiguzi. Cyakemuye ikibazo. Niba ibyaha byawe byatukuraga: biraba umweru nk'urubura; niba byatukuraga nk'umuhemba, biraba umweru nk'ubwoya bw'intama.» Rero, nta cyaha ugira. Uzira icaha. Icyo waba warakoze cyose, cyangwa icyo ukora, uko biri kose nta cyaha ugira. Upfa kuba warakiriye Yesu Kirisito nk'Umwami n'Umukiza wawe, ibyaha byawe warabibabariwe. Icyo wababariwe cyose «Imana ntikikikubaraho kandi Yaracyibagiwe.»

None, ibyo bifite musaruro ki? Ibyo biguha, nyuma yo kuzuza ibisabwa, Mwuka We, kugira ngo ubashe kumukurikira, no gukora nk'uko We yakoze, ukorera abandi bazakurikira.

38 Yari Umuntu umwe, Umuntu utunganye. Yatanze ubuzima Bwe bwite, Yaguhaye urugero. Noneho, ni iki tugomba gukora?

Ni byiza, icy a mbere nshaka kuvuga, ni uko yesu atigeze yiberaho Ubwe. Ubuzima Bwe yabweguriye abandi. Neza na neza, ubwo ni bwo Buggingo Buhoraho. Iyo uvuga uti ngiye ku rusengero, hanyuma ugakora imrimo myiza, ni byiza. Arikoiyo ubayeho wiberaho ubwawe, nta Buggingo Buhoraho uba ufite. Ubugingo Buhoraho, ni ukuberaho abandi. Ni cyo Bwagaragaje, ubwo Bwazaga mu Mwana w'intama w'Imana. Yabagaho, kandi Yari afite Ubugingo Buhoraho, kuko Atiberagaho. Yaberagaho abandi. Kandi wakira Ubugingo Buhoraho, mu kwakira kiriya Gihe, ni bwo utaba ukibereyeho ubwawe. Uberaho abandi.

39 Hari uwavuze ati: "Bishoboka bite ko ureka abantu bakakwita ibyo bashatse byose, batyo?" Ntiwibereyeho ubwawe. Ubereyeho abandi, kugira ngo ushobore gucungura uriya muntu. Muhinduka abana. Uri umwana. Ujya mu mwanya wa Kirisito. Uri umwana, rero, ntukibereho ubwawe, beraho abandi.

"Mu by'ukuri, Mwene Data Branham, nshobora kuberaho uyu mwene Data, kuko ari umuntu ufite igikundiro." Si ibyo.

Beraho umuntu ukwanga. Beraho umuntu wakwica aguciye urwaho. Ni cyo bamukoreye. Baramwishe, maze Arapfa, kugira ngo Ashobore kubakiza. Ubwo ni bwo Buggingo Buhoraho. Twebwe... Ni cyo ufite mu mutima wawe, ni bwo uromboreza ugana mu Ijuru. Ah'ubwo utamba ibyari ibyawe, kukabihara, nk'uko intama itanga ubwoya bwayo. Utumbira kure biruseho, werekeza i Kaluvari.

40 Niringiye ko ibi bigufasha mu gufata ighagararo. Ni cyo urusengero, ni cyo abantu bose bagomba

gukora: ugomba kubona icyo uri cyo, n'intego iyo ari yo. Itorero, si ukujya mu rusengero, kujya gucuranga no kuririmba indirimbo zihimbaza Imana gusa. Itorero ni ahantu ho kwikosorera. "Urubanza ruhera mu nzu y'Imana."

"Tugomba kwibona nk'abapfuye, kandi nk'babereyeho Kirisito." Rero, Yadushyiriyeho uburyo, kugira ngo tubashe kwitamba ubwacu, ku bw'umurimo We, ngo tumukurikire. Iyo tumukurikiye, tuba tubayeho Ubuzima We yabayeho. Ni igitangaza, ibyo.

41 Yesu yavuze, Yabivuzeho. Ngiye kubibahaho imirongo mike. Mutege amatwi. Ntimucikwe n'ibi. Yesu yavuze ko kiriya Gihe yajyaga kuvangura abantu, nk'uvangura intama n'ihene, maze Akabwira ihene ati: "Nimujye ibumoso", na ho ku ntama Ati: "Nimujye iburyo."

Hanyuma Abwira ihene ati: "Nimumve imbere. Kuko nari nshonje, ntimwampa icyo ndya. Nari muri gereza, ntimwansura. Nari nambaye ubusa, ntimwanyambika. Nari mfite inyota, ntimwampa icyo nywa. Nari ndwaye, ntimwansura. Rero, nimumve imbere."

Na ho kuntama Avuga ati: "Nari nshonje, mumpa icyo ndya. Nari nambaye ubusa, mumpa icyo nambara. Nari ndwaye, muramfasha."

Kandi, mwitegereze, ntimucikwe n'ibi, torero. Mukomeze ibi mu mitima yanyu iteka ryose. Byarikoze! Abantu babikora ari nta gahato. Umuntu ugira icyo akora, kuko ari icyo agomba gukora, umuntu ukugaburira, kuko ari icyo agomba gukora, afite imyumvire yo kwikunda. Byakagombye kuba ubuzima bwawe, ari ibyo

42 Ziriya ntama, byarazitangaje cyane ku buryo zavuze ziti: "Mwami, ni ryari Washonje? Maze ntitwashaka kuguha icyo Urya... Ni ryari Washonje, ntitwaguha icyo urya? Ni ryari Wambaye ubusa, ntitwaguha icyo Wambara? Ni ryari Wagize inyota, ntitwaguha icyo Unywa? Ni ryari Warwaye, ntitwagufasha?"

Byarikoze, binyuze mu rukundo, gusa byari Ubuzima Bwawe bwari muri bo. Yoo Mana, reka abantu babone icyo Kaluvari yadukoreye. Byikoze.

"Ibyo byabaye ryari, Mwami? Nta byo twari twarigeze kumenya."

Nimubirebe. Yesu yarahindukiye maze Avuga ati: "Igihe cyose mwakoreraga aba ibyo bintu, ni Njye mwabikoreraga."

Ubuzima buzira ukwikunda. Atari nyuma yo gutekereza, atari ukubitekerezaho, ah'ubwo wapfuye ku by'iyi si, maze uba muzima muri Kirisito, winjira mu muhanda mugari, ku buryo biriya bintu byikoze. Urabikora, gusa. Atari ukuvuga uti: "Ni byiza, mu by'ukuri, Mwami; Mwami, Ushaka ko mbikora."

43 Si ibyo. Uri urugingo Rwe gusa. Mwuka We ari muri wowe, ikaba ari na yo mpamvu ukora nk'uko We yakoraga! Ahaa! Ubyumve neza.

"Inzira nk'ijo igaragarira umuntu nk'ibineye, ariko iherezo ryayo, ni inzira y'urupfu."

"Abambwira bati: 'Mwami, Mwami!' si ko bose bazinjira, ah'ubwo bariya bakora ubushake bwa Data", gusa bivuye mu ndiba z'imitima, ku bwende.

Nyamara, kiriya Gihe i Kaluvari cyishyuye ikiguzi, kugira ngo tumere dutya.

Si ukuvuga uti: "Urabizi, igihe kimwe, umupfakazi Jones... Nta Makara yari afite, maze njya kuyamugurira. Ndabikubwiye, hari mwene Data wari ukeneye ikositimu, maze njya kuyimugurira. Imana ishimwe! Ndi Umukirisito." Yoo, la la! Mbega umutindi wikunda wo kubabarirwa. Uri indyarya.

"Ikiganza cyawe cy'iburyo ntikikamenye icyo ikimoso cyawe gikora, kandi ikimoso cyawe ntikikamenye icyo ikiryo cyawe gikora." Birikora muri Kirisito, ku buryo ubikora, uko biri kose. Ni yo kamere yawe. Ni yo mico yawe. Urabikora, uko biri kose. Ubwo gusa ni bwo Bungo buri muri wowe. Ugengwa byuzuye n'uwo Mwuka, kandi ni We ubaho Ubuzima Bwe muri wowe.

44 Yoo, wumva uwo Mwuka ushimwa, ubwo Bungo. Pawulo yavuze ati: "Si njye ukiriho, ah'ubwo ni kirisito uraho muri njye", birikora.

"Mu by'ukuri, ndabikubwiye, Mwene Data Branham, twebwe, turi Abakirisito. Dufasha aba bantu. Dufasha bariya bantu." Yoo, la la! Korwa n'isoni. Ubukirisito, si ubwo.

Ubukirisito - birikora gusa, biriya bintu ni ibyo gukorwa. Ni cyo gikwiye gukorwa. Wibagirwa ibyo byose, by'ukuri, nta n'ubwo utekereza ko «jyewe, oya». Genda, ubikore.

Kirisito yeguriye Imana ubuzima Bwe byuzuye. Yitanze Ubwe, nk'umugaragu, Akorera rubanda. Yitanze ubuzima Bwe ku bwende. Ntiyari ahaswe kubikora. Ntiyabikoze agononwa. Ntiyavuze ati: «Bene

Data, mwakagombye kumpa icyubahiro cyinshi, kuko Nazanywe no kubapfira.» Nta n'ijambo na rimwe Yabivuzeho. Yarapfuye, uko biri kose, kuko Yari Imana muri We.

Ni Imana muri wowe, ni Imana muri njye, Idutera gushyira abandi imbere.

45 Intama mu ruhande rumwe.

Umwe muri bo azavuga ati: «Mu by'ukuri, nakoze ibi. Kandi, Mwami, nakoze biriya.»

Avuga ati: «Nimumve imbere, mwa nkozi z'ibibi mwe. Sinigeze kubamenya.»

Iyo aba itorero ryashoboraga kugera ubwo rishyikira uko kuri k'urufatiro, ko atari ikintu ugerageza gukora, atari icyo wihatira gukora. Ni ikintu cyavukiye muri wowe.

46 Mbabarira, mupantekote ncuti yanje. Ndi umupantekote. Ariko incuti zanje z'abapantekote zigeze ubwo hagomba kubaho muzika irimo ibyuma bifite injyana yo mu rwego rwo hejuru, abacuranzi ba kabuhariwe, cyangwa gukoma mu mashyi, cyangwa ingoma, kugira ngo abantu bavuze akaruru. Ibyo, ni ibiyumvayumvo gusa. Za famfare zibanziriza imirwano. Bumvisha abantu ibiyumvayumvo by'imirwano. Kuririmba, ndayemera. Gukoma mu mashyi, ndabyemera. Ah'ubwo, ndabyemera. Ni ukuri. Twakagombye kugira ibyo bintu.

Ariko mwirengagije iby'ingenzi; ni ubwo buzima bwo kwitamba, ko Imana iba muri wowe: gukora icyiza bikizana muri wowe, kuko ari byiza. Ugakomereza aho, byonyine, bikakubera ibisanzwe. Ukiheraho utsyo, byonyine. Hanyuma ukareba, ukabona ibiraho. Byonyine, u-... ntu-.... Uri mu muhanda mugari, - ni cyo Kaluvari yakumariye, - mu muhanda mugari, wagukinguriwe kiriya Gihe.

47 Noneho, noneho, mwibuke, ntushobora kuba ihene igice, ngo ube n'intama, ikindi. Ntibibangikana.

Ni byiza, hari abantu benshi bavuga bat: «Yego, murabizi? Dufite idini mu itsinda ryacu. Twebwe - dufasha impfubyi. Dukora ibi.» Nta kibi kiri muri ibyo, ariko uritaka gusa. Ntugakore ibyo.

Yesu yavuze ati: "Ni ugira uwo ufashisha ikintu, ubikorere mu ibanga". Birikora gusa, ni ikintu muri wowe, ntibigusaba ikirenze kujya gushaka amazi make. Ufite inyota. Niba umuturanyi wawe afite inyota, umutekerezezo na we. Ubukene bw'umuturanyi - umutekerezezo, nk'aho ubukene ari ubwawe. Ah'ubwo nta n'icyo bikubwiye, wikomereza ubuzima bwawe, byonyine.

48 Nyamara, ntushobora kuba intama igice, ngo ube ihene ikindi.

Rero, ni uvuga uti: "Mu by'ukuri, itorero ryacu rifite inzego. Dufasha abakene, kandi dukora ibi, kandi dukora biriya, kandi dukora na biriya bindi."

Niba ufite kiriya gice kimwe udafite ikindi, Ubuzima bwa Kirisito muri wowe, urabikorera ubusa. Yesu... Pawulo yavuze muri 1 Abakorinto 13 ati: «N'ubwo natanga ibyanje byose ngo ngaburire abakene, n'ubwo natanga umubiri wanje ngo utwikwe nk'igitambo, nta cyo byamarira.»

Biruhije kumva, ibi, ariko ni Ukuri. Ugomba kugera ubwo ubasha gushyikira uku kuri, kumenya icyo Kaluvari yakumariye.

49 Turayireba, maze tukavuga tuti: «Yoo yego, ni byiza.» Si ibyo. Niba uiya Mwana w'Imana, byaramubereye ngombwa kujya i Kaluvari, kuhabambwa, buri mwana uje agomba kujya i Kaluvari. Agomba, na we, kugira Kaluvari ye. Ugomba kugira igithe cyawe i Kaluvari. Ngomba kugira igithe cyanje i Kaluvari. Ni cyo gikemura ikibazo cy'icyaha. Si ugukorana mu ntoke n'umubwirizabutumwa; si ukwinjira mu idini bazunguzanya ibiganza, habe no kwinjizwa n'urwandiko, habe no kwinjizwa n'umwuga. Ah'ubwo ni ukwinjizwa n'Ivuka. Ntiyigeze atanga urwandiko. Ntiyigeze atanga umwuga. Aratubyara. Ni uko tuhinjira. Ni bwo dutangira kubaho ubuzima bwa gikirisito.

50 Noneho, indi mpanuro. Ihene igice, intama igice, ibyo, nta bibaho. Nturi ihene igice, intama igice. Uri ihene cyangwa intama, kimwe muri ibyo.

Nyamara, niba ukora ibyiza gusa, hanyuma ugaterekereza ko uzinjizwayo na byo, icyo gihe, Kaluvari yaba itari ngombwa ko ibaho. Mu mategeko, bari babisanganywe. Ah'ubwo, kuba kiriya Gihe i Kaluvari cyarabaye ngombwa, bwari uburyo bwo kubishoza, ariko tube abahungu n'abakobwa b'Imana. Icyo ni cyo kiriya Gihe i Kaluvari cyabaye. Icyo ni cyo cyabamariye: ngo mubashe gukora, gukurikira no gukora nka Yesu.

Nyamara, umugezi ntutemba icyarimwe mu byerekerezo byombi, epfo na ruguru. Umugezi utembara mu cyerekerezo 1 gusa. Ni cyo kimwe, Mwuka w'Imana atembara mu cyerekerezo 1 gusa. Ntiyivanga n'ikintu na 1. Ahora atembara mu cyerekerezo 1.

51 Nimwitegerezze neza Yesu, mu kwanzura; Yesu yavuze ati: "Imirimo Nkora, na mwe muzayikora, ndetse muzakora n'iyiruta, kuko Ngiye kwa Data."

Si iri teraniro mbwira ibi bintu, - mwebwe, murabisobanukirwa, - ah'ubwo ubu Butumwa bwafashwe amajwi. Ibihumbi mirongo ingahe by'abantu babuteze amatwi, mu isi yose.

Ngiye guhita nsubiza iki kibazo, ku muneguranyi. Bakunze kumbwira... Bavuga bati: "Niko, wizera Bibiliya? Yesu yavuze ati: 'Iyi mirimo Nkora, na mwe muzayikora, ndetse muzakora n'iyiruta, kuko Ngiye kwa Data."

52 Bishoboka bite ko uba mubi aka kageni, mugabo? Bishoboka bite ko ubura ihishurirwa ako kageni, uzimiriye muri izo tewolojiya z'inyamashuli, mu myumvire ya kamere y'ibantu? Ncuti yanje wazimiye, ntushobora gusobanukirwa ko Bibiliya isobanurwa mu buryo bw'umwuka?

Yesu yashimiye Data kuba Ibyo Yarabihishe abanyabwenge n'abashakashatsi, maze Akabihishurira abana bato, bajyaga kuba biteguriye kuza i Kaluvari.

53 Noneho, mwitegerez. Yesu yavuze, mwitegerez uburyo Yabivuze. "Imirimo Nkora," Ariho arayikora none aha, "Imirimo Nkora none aha, gukiza abarwayi, kuzura abapfuye, guhumura impumyi, iyi mirimo, na mwe muzayikora. Muzayikora, nimunyizera. Muzakora iyi mirimo. Hanyuma muzakora n'iyiruta, kuko Ngiye kwa Data."

"Hasigaye ige gito, maze isi ntibe ikimbona; ariko mwebweho, muzambona. Nzaba ndi kumwe na mwe, ndetse muri mwe, kugeza ku mperuka y'isi. Sinzabasiga nk'impfubyi. Nzasaba Data; Azabohererera undi Mufasha, Mwuka Wera, Uwo isi idashobora kwakira; ariko mwebweho, mushobora kumwakira."

54 Noneho, mwitegerez. Imirimo "iruseho", ni ukugira Imbaraga mu Itorero, bitari ugukirisha abarwayi isengesho, ukwirukana amadayimoni gusa, ah'ubwo guha abizera Ubugingo bw'Iteka. Mwuka Wera yari agiye kuza, hanyuma Agahabwa Itorero, ngo Atange Ubugingo. Yoo! Ngicyo icyo Kaluvari yamaze. Yafashe abagabo n'abagore bangiritse, batagira agaciro, maze Abageza kuri iki gihagararo, cyo kuba abahungu n'abakobwa b'Imana, gukiza abarwayi no gutanga Ubugingo buhoraho; Aha Mwuka Wera abizera bumvira, abantu bahoze batizera, bagahinduka abizera, maze bagatanga Ubugingo bw'umwuka buhoraho. Mbega ukuntu biruseho, kuvuga...

55 Uyu mugore urwaye uryamye hano, nshobora gukora isengesho ryo kwizera, maze agakira. Ni ikintu gikomeye. Ni byo Yakoraga kiriya gihe.

Yavuze ati: "Ah'ubwo muzakora n'iyiruta. Ngiye kubaha Imbaraga, zitari izo kumuzura by'agahe gato gusa, ah'ubwo kumuha ubugingo Buhoraho, ubw'Iteka." Batindi b'impumyi, ni iki kibatera gucikwa n'ibi? Ntimubona icyo ikintu "kiruseho" ari cyo? Ni ikintu kiruseho kitigeze kubaho, ni uguha abantu Ubugingo Buhoraho.

56 Ubugingo Buhoraho, ni iki? Ubuzima Yabayeho, Ubuzima bwari muri We. Kubaha abandi. Ese umuntu yashobora gukora ibyo? Umwana w'Imana yabishobora.

Yesu yavuze ati: "Abo muzababarira ibyaha, bazaba babibabariwe; abo mutazababarira, ntibazababarirwa."

Nyamara, ni ho itorero gatolika n'abandi benshi bakoreye ikosa rikomeye. Bajya hariya maze bakavuga bati: "Nkubabariye ibyaha byawe." Si ibyo.

Ibyaha babibabarirwaga bate, muri Bibiliya? Petero yashubije icyo kibazo ku Munsi wa Pantekote. Babaza bati: "Twakora iki kugira ngo dukizwe? Twashobora dute kubona icyo mwebwe, mufite?" Yanditse amabwiriza nk'umuti utanzwe na muganga. Ababwira icyagombaga gukorwa.

Yavuze ati: "Nimwihanire Imana, umuntu wese muri mwe abatizwe mu Izina rya Yesu Kirisito." Kubera iki? Ngo mubabarirwe ibyaha byanyu. Ngiyo imirimo "iruseho".

57 Ni bangahe muri mwe, ababwirizabutumwa, muri iki gitondo, ni bangahe muri mwe, mwumva Ijambo ryanje kuri bande ifata amajwi, mwiteguye kujya i Kaluvari muri iki gitondo? Kubona icyo Imana yabakoreye hariya. Mukareka ayo mahame yanyu y'idini, maze mukabwiriza Inkuru Nziza. Haleluya! Ahasigaye ni ahanyu noneho. Mugije kubikoraho iki?

"Kuko Ukwihana no kubabarirwa ibyaha bizabwirizwa mu Izina Rye, mu isi yose, uhoreye i Yerusalem." Haleluya! Icyubahiro kibe icy'Imana! Ngibyo!

Kaluvari ikubwiye iki? Kiriya Gihe cyakumariye iki? Ese cyagupakiye tewolojiya? Ese cyakugize umwibone? Cyangwa cyakugize Umukirisito, wiweguriye Imana byuzuye? Haleluya!

Icyaha cyababariwe! "Muzakora imirimo iruta iyi", kubabarira ibyaha, mu Izina rya Yesu Kirisito.

Ah'ubwo ni ukubera amahame n'amadini, n'ibyo byose, muboshewe ku buryo mugikorera isi.

58 Nimumbwire umugabo, nimumbwire umugore, ushobora kuza i Kaluvari, yarangiza agashaka kwigira

igitangaza kuko hari uwagize icyo avuga. Nimumbwire uburyo umuntu yahangara Kaluvari, ubwo Yesu yabambwaga, kiriya Gihe i Kaluvari... Byashoboka bite ko wagira igihe cyawe i Kaluvari hanyuma ukahava uri umwibone? Byashoboka bite ko wavayo uri agakinisho k'idini, ngo ubwirize inyigisho za kimuntu? Kubera iki hatagutera gucira Ijambo ry'Imana bugufi uramutse ugeze hariya, wavayo wicishije bugufi. Byashoboka bite ko wifuza kuba umuntu ukomeye mu idini ryawe, ugahabwa ibyubahiro, mu gihe Yesu Kirisito, Umwana w'Imana, Yicishije bugufi Ubwe, ku buryo umubiri We washenjaguwe, mu maso He huzuye ibikororwa, bamukojeye isoni kandi bamusuzuguye? Bamwambitse ubusa maze bamubamba ku karubanda. "Ntiyitaye ku isoni." Byashoboka bite ko ugera i Kaluvari, ngo ugaruke utandukanye n'icyo We yabaye: igisuzuguriro, isoni?

Uravuga uti: "bazanjugunya hanze." Bazahakujugunye!

Gira igihe cyawe i Kaluvari, ni bwo Imana izakorana na we ubushake Bwayo. Ngiye kubisubiramo. Gira igihe cyawe i Kaluvari, ni bwo Imana izakorana na we ubushake Bwayo.

Dusenge.

59 Mwami, yoo Mana, tujyane twese i Kaluvari none aha. Dushoboze kwiyambura kamere yacu, Mwami, gutinya abantu, gutinya icyo undi muntu yashobora kuvuga. Ah'ubwo isi yamuhinduye igishungero, iramukwena, ariko Yarumviye, kugeza ku gupfa. Yarumviye, kugeza ku gisuzuguriro. Yarumviye, no munsi y'agahato k'ubukoloni.

Kandi tuzi ko, ubwo Satani yakubitaga iyi si, yabaye umutware n'umuyobozi kuri iyi si. Yabihamirije imbere y'Umwami wacu, avuga ati: "Ziriya ngoma ni izanjye. Nzazikoza icyo nshatse." Kandi tuzi ko uhoreye icyo gihe, ukageza none, iyi si, munsi y'umuvumo, yategetswe n'ewayivumye.

Ah'ubwo, Mana, yoo Mana, dukorera Ubwami butavumwe.

Mana Data, ni igitangaza, biriya bintu bikomeye Wakoze mu isi ya senema none. Kuba Waremerereye kubaho kwa za filimi zikomeye, nka "Amategeko 10", n'ibindi, zikorwe, kugira ngo bereke abagabo n'abagore, batanakandagiza ikirenge mu rusengero, ah'ubwo kubereka ibyo ari byo. Inzira y'Imana ni inzira yanzwe n'isi. Kuko tumeze nka... Twinjira mu Burusiya butegekwa n'amatwara ya gikomunisite.

Turi muri iyi si, ariko ntituri ab'iyi si. Twagiye i Kaluvari. Twaribambye, ku bw'Ubwami bw'Imana, ngo tube mu Bayo. Tuitaye ku byo isi ishobora kuvuga, dufatanya inzira n'umubare muto w'abasuzuguwe b'Uwiteka. Dukataza tugana ku muzuko, kandi twizera ko igehe kiri bugufi, Mwami, ubwo tuzazuka, ngo twinjire mu Bwami buzaganza iyi si. Nk'uko Daniyeli yari yarabibonye mbere, isi yose yari yashwanyaguritse, nk'umurama watumuwe n'umuyaga ku mbuga mu mpeshyi. Ariko umusozi, rya Buye ryarakuze rihinduka umusozi munini wuzura isi. Iryo Buye rizaza. Yoo Mana, turashaka kuba mu bagize ibyo. Twiyange, buri munsi twikorere umusaraba wacu, tubereho Kirisito, tubereho abandi. Bidukorere, Mwami.

60 Niba hari abahari muri iki gitondo, batamuzi nk'Umukiza wabo, kandi bashaka ko tubibuka mu isengesho risoza, mwifuzaga ko uyu munsi ubabera igehe cyanyu i Kaluvari, mushaka kuzamura ikiganza, ngo muvuge muti: "Nsengera, Mwene Data Branham. Ndashaka ko Ambera Umukiza." Imana iguhe umugisha, musore. Hari undi? Imana iguhe umugisha, mwene Data, hariya, inyuma.

Haba hari undi, wavuga ati: "Ndashaka kumumenya. Ndashaka ko iki aba ari cyo kimbera igehe i Kaluvari. Ndabirambiwe. Bimariye iki kutita ku cyo navukiye, icyo ngomba gukora? Navukiye kuba umwana w'Imana, none ntsimbaraye ku by'isi. Yoo Mana, mbambwe none. Nibambe, none, jyewe ubwanjye n'ibitekerezo byanje, kugira ngo mbashe kubana na Kirisito, no kuberaho abandi. Uko banyitwaraho kose, banseka, bantoteza, bamvuma, n'ibindi, nkomeze gusa kwigendera nciye bugufi, noroheje nk'umwana w'intama, nk'uko We yabigenje. Kandi, igehe kimwe, Yasezeranye kuzanzura, ku Munsi w'imperuka. Ntegeree uriya Munsi." Ese hari abandi baba bashaka kuzamura ikiganza? Imana iguhe umugisha, hariya inyuma; na we. Ni byiza cyane. Abandi, gusa... Imana ibahe umugisha. Imana ibahe umugisha. Abandi, hariya, mbere y'uko dusenga.

61 Dawe wo mu Ijuru, byaravuzwe, ubwo Petero yabwirizaga, ku Munsi wa Pantekote ngo: "Abizeye bose bongewe ku Itorero." Bari bizeye n'umutima wabo wose. Aba bantu bamaze kuzamura ikiganza, nizeye ko bizeye n'umutima wabo wose. Niba ari ko bimeze, hari urubatirizo rwuzuye amazi ruteguye hano. Barashaka kubabarirwa ibyaha byabo. Hano hari umuntu ushabora kubabatiza muri iyo Zina, Izina rimwe rukumbi munsi y'Ijuru ryahawwe abantu, iyo tugomba gukirizwamo.

Mu by'ukuri, nk'uko navuze mu kanya iyi mirongo y'Ibyanditswe Byera, ko "ukwihana no kubabarirwa ibyaha bigomba kubwirizwa mu Izina Rye, mu isi yose, uhoreye i Yerusalem". Kandi, i Yerusalem, ubwo kwihana no kubabarirwa ibyaha byabwirizwaga, intumwa yababwiye Ibyanditswe Byera, maze ibabwira ko "bagombaga kubanza kwihana, hanyuma bakabatizwa mu Izina rya Yesu Kirisito". Uwo, ni umurimo w'umubwirizabutumwa. Bo, bagombaga kwihana, na ho we, akaba yaragombaga kubabatiza, kugira ngo bababarirwe ibyaha byabo. "Abo muzababarira ibyaha, bazaba babibabariwe; abo mutazabibabarira, nta

byo bazababarirwa."

62 Dawe, ni gute isi yishyize mu kaga aka kageni? Kuki abantu batizera Ubutumwa Bwiza? None babusimbuje ibindi: amazina y'ibinyoma, umubatizo w'ikinyoma, imibatizo ya Mwuka Wera y'ikinyoma, gukora mu ntoke z'abagaragu b'Imana, gukoresha ibyitiriro Data, Mwana, Mwuka Wera, utagira aho wabisanga mu Byanditswe Byera. Ni igihimbano cy'Abaroma; si inyigisho ya gikirisito, nta ho wayisanga muri Bibiliya. Kubabarirwa ibyaha, kubabarirwa ntibishokera mu cyitiriro runaka, ah'ubwo ni mu Izina rya Yesu Kirisito.

Nyamara, Dawe, tuzi ko bitamamaye. Inzira Zawe ni uko zahoze. Ariko Emera, muri iki gitondo, abagabo n'abagorebagere kuri kiriya gihe, kuri kiriya gihe cy'i Kaluvari. Mu gihe Yesu, Yasuzuguye kiriya Gihe, ziriya soni, Yacujwe imyenda Ye, Yashenjaguwe, Yaciriwe mu maso, kandi Yabaye igishungero cy'isi yose, cy'itorero, abantu bakagombye kumukunda. Ibiri amambu, Atitaye kuri ibyo byose, Ntiyabumbura akanwa, maze Ajya gupfira abantu bamukwenaga.

63 Yoo Mana, tujyane i Kaluvari, muri iki gitondo. Kandi ni bavuga ko turi abasazi, ni bavuga ko twumvise nabi Ibyanditswe Byera, bazavuge ibyo bazashaka byose, yoo Mana, ntibashobora guhagarara mu Bwiza bw'Imana, maze ngo bavuge ko atari ukuri. ntibashobora gufata Bibiliya, ngo bayikoreshe batwikira icyaha cyabo. Bibiliya itwikurura icyaha cyabo, ukutizera kwabo; kwamamara kwabo, kugenza nk'abandi bose. Nibaze i Kaluvari, muri iki gitondo.

"Uhoreye i Yerusalemu, ukwhiana no kubabarirwa ibyaha bigomba kubwirizwa mu Izina Rye, mu mahanga yose, uhoreye i Yerusalemu." Nibatere iriya ntambwe na bo, iyo kubambwa: gushenjagurwa, gucirwa mu maso, gushungerwa, kwitwa amazina yose ashoboka, abagambanyi b'iyobokamana, ba rushenyi b'amatorero, baktwa amazina bazashaka yose. Tubashe, muri iki gitondo, Mwami, gufatanya inzira na ziriya nsuzugurwa z'Uwiteka. Tubashe kugenda nk'intumwa, tudakebakeba, haba iburyo cyangwa ibumoso, ngo dukorere Imana n'umutima mwiza. Bidukorere, Dawe.

Noneho, kiza abarwaye n'imbabare bari buze mu murongo wo gusengerwa. Abazamuye ikiganza, bashobore kwihana babikuye mu ndiba y'umutima, none aha. Abari, mu gihe kirekire, barasigaye inyuma, babashe kwihuta bagana amazi, maze bababarirwe ibyaha byabo, binyuze mu Izina ry'Igitambo, Yesu Kirisito, Umwana w'Imana. Amen.



[www.messagehub.info](http://www.messagehub.info)

Ibibwirizwa bya  
**William Marrion Branham**  
"...mu minsi y'ijwi ..." Ibyah. 10:7